

**Utoqqalinersiallit tamarmik toqqissisimasumik akilersinnaasamillu
angerlarsimaffeqartinnissaat qanoq ililluta qulakkeersinnaaneripput pillugu
apeqquteqaat aallaavigalugu oqallinnissamik siunnersuut.**
(Inatsisartunut ilaasortaq Bo Martinsen, Demokraatit)

Akissuteqaat

(Isumaginninnermut, Suliffeqarnermut, Nunamut Namminermut Avatangiisinullu Naalakkersuisoq)

Siullermeerinninneq

Naalakkersuisut siunnersuuteqartumut siunnersuut pillugu qujassuteqarput.

Naalakkersuisut utoqqaat tigoriaannarnik ikitsuinnarnik aningaasaatillit akilersinnaasuni najugaqarnissaannut periarfissaqassasut pillugit siunnersuuteqartoq isumaqatigaat. Ullumikkut utoqqaat ineqarnermullu aningaasartuutaannik ineqarnermut tapiissutinik aqqissuussineq aqputigalugu tapersorsorneqarnissaat periarfissaareerpoq. Utoqqalinersiallit assersuutigalugu malittarisassat atuuttut malillugit ineqarnermut tapiissutitut immikkut ittumik ilanngaateqarput.

Sinnersuuteqartoq ilinniartut ineqarfii pillugit aqqissuussinermut innersuussivoq. Naalakkersuisut eqqumaffigeqquvaat, ilinniartut ineqarfiinut ineqarnermut akiliut 1990-it ingerlanerannili nalimmassarneqarnikuunngimmat, aamma ineqarnermut akiliut qaammammut 850 kr-inut aalajangerneqarluni. Tamanna isumaqarpoq, Namminersorlutik Oqartussat isertitatigut amigaateqarnikkut aserfallatsaaliuinerup matussusernissaanut annertuumik aningaasartuuteqartartut. Ukiumut aningaasanut inatsimmi ingerlatsineremut aserfallatsaaliuineremullu pisariaqartunut aningaasartuutit matussuserniarlugit aningaasaliinerit annertuut immikkoortinneqartarput. Tamatuma saniatigut Namminersorlutik Oqartussat aamma ilinniartut ineqarfiinik nutaanik pilersitsineq pillugu akisussaaffeqarput aningaasartuutillu aamma annertusarlutik.

Naalakkersuisut ilinniartut ineqarfii pillugit ilusiliinerup utoqqarnut suliaasaqarfimmut nuunneqarsinnaanerata eqqortuuneranut aallaaviatigut isumaqataaangillat. Utoqqarnut suliaasaqarfiup maannakkut ilusiligaanera iluaqutissarpassuaqarpoq, kommunit najugaqarfinnik, utoqqarnut innersuussutigineqarsinnaasunik, tak. inissianik attartortitsisarnermut peqqussut, pilersitsinissamut akisussaaffeqarlutik. Kommunit inissianik inuiaqatigiinni eqimattanut aalajangersimasunut qulakkeerinissamut periarfissaqarput, tassunga ilanngullugit utoqqaat. Taamaalillutik kommunalbestyrelsip nammineq inissiatimini inissiat immikkoortissinnaavai, inuiaqatigiinni eqimattanut aalajangersimasunut innersuunneqarsinnaanngortillugit attartortillugillu. Kommunit najukkami pisariaqartisineq pillugu ilisimaarinnippat. Kommunalbestyrelsit utoqqarnut naammattunik inissaqartitsinerup qulakkeernissaanut, aamma kommunit utoqqarnut suliaasaqarfimmut pilersaarteqarnissamut annertuumik akisussaaffeqarput. Taamaattumik maannakkumut ilusiliinerup tunngatillugu, utoqqaat naammattunik inissaannik innersuunneqarsinnaasut pillugit Naalakkersuisut akisussaaffeqalissappata, annertuumik akuliunnerussaaq, aamma utoqqaat immikkut ittumik ineqarnermut appasissumik akiliuteqartarnissaannut aningaasaliissutinik immikkoortitsisariaqassallutik.

Naalakkersuisut maannakkumut isumaqarput, kommunit najukkami suliassanut pilersaarutinullu akisussaaffeqarnerat pitsaanerpaasoq.

Utoqqaat angerlarsimaffiat sunarpiaanersoq pillugu malittarisassaqaanngilaq. Tamanna nassuiarnissaanut kommunit ataasiakkaanut aalajangigassaavoq. Naalakkersuisut naapertuunnerpaatut isigaat, utoqqarnut angerlarsimaffiit pillugit malittarisassat utoqqarnut tapersersuinissamut inatsisissami aalajangersarneqarnissaat. Tamatuma saniatigut Naalakkersuisut tunngaviusutut isigaat, illoqarfinni annerni tamani utoqqaat najugaqatigiiffiannik pilersitsisoqassasoq.

Utoqqaat angerlarsimaffii pillugit malittarisassat utoqqarnut tapersersuinissamut inatsimmi aalajangersarneqarpata, peqatigalugu (DUT) aqqutigalugu kommunit utoqqaat angerlarsimaffiinik pilersitsinermut aserfallatsaaliuinermullu aningaasartuutit atorneqartut matussuserneqarnissaannut piumasaqarnissaannut tunngavissaqalissagaluarpog, kommunit maannakkumut utoqqaat angerlarsimaffiinik neqerooruteqarnermut aqqissuussinermullu piumasaqaatit nutaat malunnaatilimmik aimmikkooruteqarpata. Tamatumunnga piumasaqaataavoq, immikkoortuni pilersaarutit pillugit piumasaqaataasussat aqqutigalugit, kommunit utoqqarnut suliassaqaarfiup pilersaarusiornissaannut pisussaaffeqalernissaat. Tamanna ilaatigut kinguneqassaaq, innuttaasut agguataarnerisa ineriartorneranni utoqqaat amerleriartornerat naammassiniarlugu, kommunit utoqqaat angerlarsimaffiinik naammattunik sanaartortariaqartut. Tamatumunnga utoqqaat angerlarsimaffiinit malittarisassat kommuniniillu DUT piumasaqaatit malitsigisaanik aningaasaqarnikkut periarfissaqarneq isiginiarneqarluni aalajangersaasoqartariaqassaaq.

Eqikkaaniaraanni, Naalakkersuisut utoqqaat ataasiakkaat akilersinnaasaannik inissaqarnissamut periarfissaqarnissaat pillugu siunnersuuteqartup pingaartut takorluugaanut aallaaviatigut isumaqataapput.

Naalakkersuisut isumaqarput, siunissami naammattunik angerlarsimaffeqarnissaq aamma utoqqaat timikkut inuttullu pisariaqartitaat naammassiniarlugit naleqqussakkanik angerlarsimaffeqartariaqarnissaat qulakkeerneqassasut. Tamanna anguniagaq utoqqarnut tapersersuinissamut inatsisissaq aqqutigalugu ikorfartorneqarsinnaavoq.

Naalakkersuisut isumaqarput ilinniartut ineqarfii pillugit ilusiliineq utoqqarnut suliassaqaarfimmu assinganik ilusiliiniarneq pitsaanerpaajunngitsoq.

Peqatigalugu Naalakkersuisut isumaqarput, ineqarnermut tapiissutinik aqqissuussinerup maannakkut utoqqaat ineqarnermut akiliuteqartarnerannik tapersersoreerai. Utoqqarnut ineqarnermut tapiissutinik aqqissuussinermi immikkut ittumik allanik mianerinntoqassappat, Naalakkersuisut soqutigaa Inatsisartut matumani isumaat tusassallugit.

Naalakkersuisut oqallittoqarluarnissaanik kissaateqarput.